

La Reina ta entrega premio Oranje Fonds

Fundacion Movimiento ta Bida a gana un Appeltje van Oranje



E iniciativa Arubano Fundacion Movimiento ta Bida ta un di e tres ganadonan di e Appeltjes van Oranje 2024. Esaki a anuncia durante entrega di e premionan Oranje Fonds na Paleis Noordeinde. Diahuebs atardi, 3 di october Reina Máxima, den presencia di Rey Willem-Alexander y Prinses Beatrix, a presenta e Appeltjes na organisacionnan cu ta comprometi pa reduci soledad. Tur aña, Oranje Fonds ta otorga tres iniciativa social cu ta aporta na personanan den nos sociedad. E ta e di 22 edicion di e Appeltjes.

E tema di e Appeltjes van Oranje ta cambia tur aña. E aña aki e tema scogi ta: Reduci soledad hunto. E iniciadonan ta yuda otronan move y recupera control di nan bida. E iniciativanan ganado ta ricibi un Appeltje di brons, traha pa Prinses Beatrix, y cada un ta ricibi un premio cash di 25.000 euro. E tres iniciativanan ta haci hende socialmente mas fuerte y ta kita nan for di isolacion social. Nan ta haci esaki den maneranan sorprendente y inspirativo, causando cu e barera, entre e dunado y esun cu ta ricibi, ta desaparece. Hende t'ey pa otro.

Fundacion Movimiento ta Bida

E Fundacion Caribense Fundacion Movimiento ta Bida di Aruba ta gana un Appeltje pasobra nan ta yuda e grandinan pa participa plenamente den bida diario. Door di organisa reunion, tayer y bishita na cas, e confiansa propio y habilidad di e grandinan ta crece. Hende grandi tambe ta involvi activamente den duna forma na e actividadnan y ta bolun-

tario pa otro hende grandi.

Fundacion Join Nos

Fundacion Join Us di Den Bosch, Hulanda, ta gana e premio pasobra nan t'ey pa hobennan cu ta solitario y kier cambia esaki. Join Us ta trece hobennan hunto y yuda nan bira socialmente mas fuerte. Hobennan entre 12 pa 30 aña ta topa cada dos siman y ta ricibi guia di un profesional hubenil. Nan ta siña organisa actividadnan y tambe pa enfrenta nan retonan personal. Ta uza e acercamento aki awor den 80 municipio. Banda di esaki, Join Us tin un programa online pa hobennan cu no por bay riba localidad.

Fundacion Al Amal

E Fundacion Al Amal ta gana un premio pasobra e ta yuda hende muhe cu un antecedente migrante scapa di nan isolacion. Migrantenan di mas edad ta sinti nan mes cu mas frecuencia solitario y ta experiencia un soledad mas profundo cu ta haci'e mas dificil pa haya nan caminda den sociedad. Pa medio di actividad y educacion e hende muhe ta conecta cu otro y nan ambiente.

Cu e programa Domino Effect, e hende muhenan cu a sali for di soledad pa medio di e acercamento (forma) aki, ta haya entrenamiento pa lanta gruponan nobo. Di e manera aki, Al Amal ta traha pa un bida menos solitario riba termino largo pa tanto e boluntarionan, como e participantenan den nan actividadnan.